

列聖御製

六

文宗

524149  
1122  
1814  
Y. 7

BERKELEY  
LIBRARY  
UNIVERSITY OF  
CALIFORNIA

卷二十二

Carpentier



列聖御製目錄

卷之四十八

正宗大王文

卷之四十九

正宗大王文

夏身二行集目錄





列聖御製卷之四十八

正宗大王



文

殯殿告由文

丙申

嗚呼肆予小子祇承疇昔之教不待公除之限  
天討方行罪人斯得若德師一和翰申則次第接  
䟽凶言逆說淪我大義誣及先王若相老則聚  
會凶徒謀議凶䟽之日爛漫酬酢者叵測不道與  
天海致雲同一腸肚而不敢畢說以憾我先靈  
止慈之仁若載翰則包藏禍心自作窩窟和應相



老之凶言主張諸賊之凶䟽締結鬼域覬覦朝廷  
盤問之後情節畢露雖欲以勲戚曲貸奈王章何  
若範濟東讓則本以鳥隄之徒附於翰老之輩凶  
䟽則首倡凶言則耳聞綢繆之狀亦皆自服嗚呼  
小子在疚縗麻訊囚所以明我先王之志聞我  
先王之義而用慰我先王之靈也肆正諸賊之  
罪德師相老以大逆不道正法一和翰申載翰以  
誣上不道正法範濟東讓俱以知情或伏法或杖  
斃其餘干連次第究覈嗚呼奉先王之遺意討  
先王之罪人由今以往小子其可以不負先王



之志事也耶茲因常奠庸申告儀

殯殿親進香文

伏以嗚呼日暮中途嬰兒失乳躑躅呼號天地茫茫從古生人之悲莫切於此誰料小子遽罹此境耶曰祖曰孫人孰不然而以祖而兼父之慈以父而兼母之愛者自古迄今豈有若大行之於小子乎坐焉而命之扶卧焉而命之護餐焉而命之供匙箸動焉而命之奉杖屨小子生世二十有五年蓋無一日不然近年以來又無一時不然比如一氣之有呼吸一身之有形影而尤有大



焉者小子性魯才下常恐不克荷我 大行不知

其不肖託之以七鬯教之以精一之傳諭之以孝  
悌之實引之以仁義道德之門 聖心之所耿耿

者惟小子一身之外更無他焉 慈覆仁恩若是

深切小子當時但知感悅之極而長擬無窮之樂  
於萬歲矣嗚呼 大行何忍割此恩愛遽速真遊

使小子作中途失乳之兒耶小子之奉諱忽忽已

三朔矣龍樓之曉若將問寢餘閣之奠若將進餐

寶帷咫尺若將覲 龍光而聆 玉音畢竟儼然

黯然無復覩矣無復聞矣人理之痛至此極矣然



飢而食渴而飲春夏已易而視息如舊誠不料小子之頑至於此也嗚呼 大行保小子常若懷中之小兒一言動一起居之間 聖慮屢勤恐其有疾今也遑遑恤恤如窮無歸呼天而不知呼地而無應嗚呼以 大行隆天厚地之恩何不眷顧而垂憐也耶記昔乙酉之冬小子數旬委疾我 大行憂焦慮煎忘餐與寢徊徨於殿廡之間露禱於星月之下但知有小子而不知有 聖躬于是寶筭已踰七矣 隆恩所霑小子雖幸起疾而聖躬已示憊果然丙戌之春 玉候違豫自是至



今連在靜攝嗚呼 聖質如天地之悠久 王度

如日月之常鮮可以于千于萬至于無極而不幸

丙戌之 患候實基今日之禍而小子伊日之病

無或為丙戌之崇歟嗚呼 大行至慈至仁起小

子於濱危小子不能積誠願代回 聖疾於惟幾

思之及此心肝欲裂嗚呼天位孔艱天命難謨

大行之所眷顧而寄託者在此小子之所勉膺而

祇懼者在此世道之淆亂何以定之人心之千百

何以一之赤子之填壑何以奠之伏惟 大行指

導於冥冥俾無墜失焉嗚呼至哀無文至情無言



但有徹天之哭徹地之淚而已嗚呼痛哉

殯殿別茶禮祭文

伏以嗚呼人之頑忍不死者喻諸木石今小子若  
無知覺當食而食當寢而寢忽忽已五箇月矣  
廡衛之啓又不遐矣嗚呼皇皇焉望望焉又將慨  
然而不可及焉生人之痛至此而極矣嗚呼痛哉  
惟我 大行大王垂撫育慈覆之恩於小子者至  
于今二十有五載其愛也切其渥也至未嘗一時  
之間而暫離一飯之頃而或違扶持几杖周旋盤  
盂雖在 王侯違豫酬應甚難之時若聞小子之

是音小子之奏語則 天笑為新握手疊疊至於  
尋常夢囈之際諄諄不已者亦無非惟憂於小子  
也而今小子冥然到今視息如舊以一時不暫離  
之誠永作千萬古之訣以一飯無或違之心未陪  
三十里之地几杖安得更奉盤盂安得復進 天  
語亦安得承聞乎惟 陟降洋洋之靈必將眷眷  
小子之身而小子不肖頑忍不死雖謂之木石可  
也禮將即遠瞻依亦失所矣小子之攀號莫逮之  
痛其有窮已乎嗚呼痛哉

孝明殿誕日別茶禮祭文



伏以嗚呼自從因封以後日月又幾何矣節序相  
推音徽漸遠履霜露而怵惕奉烝嘗而攀號愴  
然而慕廓然而悲居然誕彌之日今又屆矣嗟  
乎近年以來每逢此日喜懼之心既深慶忤之忱  
愈切薦北斗之觴獻南山之壽或請飾喜之宴或  
請呼嵩之禮乃以賁盛時之茀祿展小子之微誠  
天笑為新聖心欣悅則上下同慶竟日而每當  
秋序漸深旬朔既過則未嘗不屈指以待此日之  
來矣嗚呼今日小子頑忍仙馭不可復攀縟儀  
不可復舉矣肅然如聞乎容聲僂然如見乎羹墻

皇皇然望望然如將及之而殿宇淒傷物色嬾變  
飾喜之宴於何而請薦壽之觴於何而獻慶變而  
哀歡變而悲雖欲復伸小子仰事之誠而不可得  
矣穹壤茫茫此懷何極嗚呼靡逮之慟與時俱深  
追遠之誠隨遇而切雖於節朔之迴歲序之遷猶  
不禁怛然而哀慕况逢此日撫念疇昔之事恍如  
昨日而獨失此致誠盡禮之所天笑之悅豫  
聖心之欣滿已矣此生不可復覩小子今日之心  
當復如何嗚呼踐位行禮以繼明志事是謂之孝  
顧今戚里相輒國勢不安小子之兩非而兩斥之



于以靖朝著而正是非者即繼明我先大王昔  
日之志事則是可以少慰小子之慟耶

厲祭文

丁酉

王若曰嗚呼此寡人之所不忍言之言也以不忍  
言而不言則非所以追先志而慰孤魂也蓋厲  
祭祭無主之鬼也厲祭之時別築一壇特命獻官  
祭某年以前無依之類俾知患候沈篤特出於  
一時之事招之四方以酹以食想感幽明庶解鬱  
結故茲諭祭想宜知悉

社稷攝行祈雨祭文

眇予寡躬儼應萬機匪食曷辟匪社曷依神理  
不遠有事輒祈元歲之早在古亦稀八路告災自  
我邦畿向日齋誠祇見龍旂尚閔滂沱莫曰霏微  
野幾無青蝗從而飛淒淒者風杲杲者暉躬詣再  
褻禮恐慢歸皇矣維神實主東土肝鬻不忒德施  
斯普阜民稼穡哀民疾苦曰雨曰暘伊格不怒胡  
今邈然繫不我祐何辜于民罪在人主時丁艱難  
穀無陳腐今或失稔將棲草莽酒既清旨舞列文  
武虔誠仰籲其雨其雨



叨承丕基虔告元祀神應俯格監予小子藐以一身臨于遐邇隨事自省夙宵靡弛朽索之御多憂少喜政豈無失事未謹始或歸于踈或流于侈自知不辟多愧前史今茲之曠豈無所以赤魃肆酷迺在於此原野飛蝗御溝無水况又畿都王者攸止黃盡禾穀青絕絲枲朝陰乍聚夕飈旋起視天夢夢我心如燬祐我生民維后土氏載物之德資生之理流月將半已矣耘耔民之無辜恫實在已油然沛然冀垂冥祉

右后土氏

人謂水旱多在元年實警惕之予敢曰然維予小子德不類前時值難虞政多尤愆縱得豐殖民志未堅孤臨于上為命維天如子事父尚幾垂憐今胡亢旱遍于八埏有萎其穀有圻其田重以蟲災如蠶再眠山麓盡濯井甃無泉朝察雲物宵占畢躔烈陽明漢心焉如燃民不聊生國其能全災止寡躬豈敢憂恤維我國稷玄化斯專莅民稼穡造化之權德施于地功參于乾不可度思匪曰其虔一雨生靈綏我朝鮮

右 國稷



百穀播始萬世被澤民賴粒食報祀靡忽臨御以  
來一心懍惕匪忘誠虔其奈德薄春晴浹旬夏暘  
跨朔乍雨旋霽罔非神錫胡不終惠尚慳普洽童  
濯山容枯涸泉脈無日不陰有風斯虐種不入土  
秋將焉穫萬姓魚喁四野龜坼哀彼何辜寔予不  
辟於赫后稷臨于東域自封有邰蒼生允殖無國  
不禋功施斯博矧今蘊隆匪神曷祝有民有食維  
神之職烈彼陽曝將近初伏圭璧之薦已遍河嶽  
敢又齋誠冀賜盈尺

右后稷氏

東關王廟修改告由文

有儼王宮有奕王靈宇宙大節日月其光冥應不  
忒佑我東方 列祖攸欽况予齋誠年年夏月敬  
奠有常庶格微忱冀垂陰庥簷楹有漏門垣宜修  
敢薦泂酌虔告厥由

南關王廟修改告由文

赫赫王神萬古英靈日月炳忠金石貫誠睠彼城  
南廟貌斯煌每歲孟夏虔薦心香垂祐東土神化  
彌彰式敬式欽予罔敢忽垣宇將繕卜日之吉茲  
緣告儀冀歆清酌



徽寧殿誕日酌獻禮祭文

慕切 羹牆節屆渚虹小子嫫嫫百感在中 前  
殿後殿同奉一宮居諸易流祥期垂終永言孺思  
曷有其窮是日之臨非不歲歲明夏之後廓然靡  
逮雖勤大享有難私謁敬奠洞酌庶幾歆格

東關王廟修改告由文

戊戌

殿宇荒頽宜即改修茲以消吉敢告厥由

東關王廟致祭文

奕奕明神翼翼斯宮誕垂冥祐永綏我東誠事之  
道實在寡躬載新墻垣載繕殿櫳非欲侈大寔寓

尊慕工既告訖煥然改觀於東歷拜謁 陵歸路  
餘懷耿往替奠酤脯

洪奉朝賀

鳳漢

致祭文

戊戌十二月丁巳朔初四日庚申外祖議政府領  
議政致仕奉朝賀洪公之訃至自文峯予率百僚  
舉哀闕庭擬成服日臨哭于公之靈筵而未能粵  
五日甲子命有司設饌外孫國王親綴文字替奠  
而告之曰嗚呼人孰無母子而顧復之恩情理之  
悲豈有予與 慈宮之比歟非 慈宮予無以為  
生非予 慈宮亦豈有今日歟公是 慈宮之父



予是 慈宮之子 慈宮三從之義唯公與予在  
焉公胡長逝忍使 慈宮抱終天之慟晝宵攀擗  
淚盡而血又使予焦憂熏心悲恨纏綿掩抑徊徨  
若將見而不可見歟嗚呼公以當世之才際 先  
王之遇託肺腑之親任股肱之責官可謂尊矣踰  
花甲之歲處元老之側年可謂高矣拖朱紵青袍  
笏滿前門闌可謂盛矣致誠盡力笙鏞皇猷事功  
可謂多矣夫何塵劫累經於風濤暮景未收於桑  
榆一隅荒山倏焉升化厭世故之多端超冥蒙之  
無何歛然若曾無是事者歟嗚呼惟予孤露少靡

依賴疾病之時公輒扶將憂虞之際公乃翊護於  
小子情可謂篤矣公之在朝時承起居於 慈宮  
歡欣之意愉悅之容藹然無間一寒一暑念念惟  
憂於 慈宮恩可謂摯矣氣鍾溫粹姿象剛明信  
人如已而無不可言者遇事英發而無不可行者  
此又公才質之美也 慈宮之所怙小子之所依  
同休共戚期于永世夫何無君之惡罪在罔赦而  
近出門庭慢君之逆人得以誅而并萃姻親噫柳  
惠不幸安世多憂飽平生之辛酸結千古之幽鬱  
公遂蹤跡棲遑身心憂煎豈非予隱痛而重惻者



歟嗚呼公既歷險履變至于今日則亦何不少須  
臾以俟乎予念 慈宮之孝思軫公衰之益甚將  
欲處公于近郊之地容待入城仰侍 慈顏俯執  
公手千端萬緒之幾年結轡于中者與之談笑而  
傾倒矣豈料二月之暫面仍作萬年之永訣歟嗚  
呼予聞精明者不與身俱化公之靈其必奕奕穹  
壤之間庶監予誠庶聞予言抑哀絨辭有淚如注  
公靈知歟不知歟嗚呼痛哉公之靈尚其歆斯

元陵親祭文

己亥

皇矣 聖祖德配于天治浹五紀化覃八埏未攀

弓劒漠彼雲鄉穹壤至慟忍經三霜荏苒之頃又  
值仲春時物嬪變感慕載新恭瞻象設咫尺如  
臨小子來拜庶幾俯歆

健元陵 穆陵攝行祭文

時序載遷雨露既濡永言 先烈萬世詒謨祇拜  
仙寢佳氣葱蘢縱未躬奠冀鑑徽衷

顯陵 徽陵 崇陵 懿陵 惠陵攝行祭

文

評官攝祀敬奠泂酌誠不有間理或俯格

洪奉朝賀

鳳漢

致祭文



嗚呼自公捐館三易其月爰卜吉兆將即住宅哀  
纒永訣禮宜執紼齋意未遂有淚盈臆蹟公平生  
少歡多憾孰云官高白首荒谷孰云年尊西河淚  
目心何信物人不我若誰憐憂時自非忘國從古  
士悲命丁磨蝎繫惟夫人系出名閥溫淑為質蚤  
正閨則誦遍袒免曰賢曰哲誕我慈宮厥祥濬  
發先公幾歲倏棄埃塏萬年斯永宛爾同穴前春  
一晤予手公執春光復還公靈予哭嗚呼予悲曷  
其有極悠悠身後責在不穀公子公孫予愍予恤  
緘辭寓懷由真匪飾期不負公公其歆酌

南關王廟致祭文

一體明神于東于南既拜且奠庶鑑微誠

東關王廟致祭文

祇拜于廟八月三日於昭洋洋是鑑是隲

景慕宮酌獻禮祭文

不肖不死又適是辰 恩維罔極慟則如新風樹  
靡停尊彝徒陳入戶儼然悅疑省晨

洪奉朝賀

鳳漢

致祭文

公之逝已及暮墓草又宿矣嗚呼痛矣嗚呼我  
慈宮攀擗呼號廢寢御素者匝歲于茲矣嗚呼子



事親以親心為心况予小子於公有祖孫之情則  
又烏得不悲且悼焉繼之以淚淫淫也永言念公  
几舄之容邈不可接益知生人之慟不堪乎幽明  
之際也嗚呼公如有知必鑑予無窮之懷也嗚呼  
公歆予是日之酌也歟尚其饗之嗚呼嗚呼

元陵親祭文

辛丑

雲輅一邈歲籥五易瑩予追遠 羹牆如覲履茲  
霜露靡年不惕矧伊重回建 儲之曆感新懷舊  
同我臣民 皇靈在天 盛德浹人恭惟 盛德  
孝弟通神文養無方舜慕克純祀未 躬裸坐必

徹晨曰替定省日涉苑北洞屬繼述九旬彌篤堂  
構有光 壇墀載屹彰厥義聲植我名節克戡大  
亂無競維烈一念昭事如臨左右感自方寸以暘  
以雨子我烝黎溝壑衽席均賦恤貢恐一不獲噫  
我廷紳蠻觸既久惟 聖斯惻破厥窩臼受爾康  
色釋爾矛戈牖昏格頑偕之大和雨露蘇枯山藪  
匿瑕治成化隆罔有邇遐 命攝匪倦曰惟詒謨  
莫售或沮亟斷洪圖一疏籲忱追提淚潛 仙遊  
遽促遺弓莫攀念我繼序罔敢懷安緒纘熙洽時  
際艱難曷繩曷乂若川方涉每夜繞壁永惟大業



五紀休明實基 邱貳於乎可忘茲歲復值 聖  
祖流虹甲又周二增予孺慕念昔 孝思望彼  
西陵展省有期來觀象設庶格我私新雨方濡宿  
莽欲菲周旋欄砌若聞噓唏籩豆載陳我享我將  
於戲 皇祖陟降洋洋尚鑑微誠歆此馨香啓佑  
無疆俾熾而昌

紫雲書院致祭文

河山正氣關洛嫡傳不由師承默契聖賢早歲橫  
渠晚年晦翁允矣大成牖我羣蒙進由董策天人  
縱橫禮正勲削綱扶彛明 聖祖曰咨倚汝治平

茅拔坡原有臣同德推車禡船一乃心力東西奔  
波信手調停蚊雷四起眷懷林扃入黨恩言罔  
解羣讜志闕纓冠樂保餌菊義嚴闢廓功大開繼  
人亡道存日星昭晰躋彼孔廡永蔽明禋予懷典  
刑慨未同辰筵講輯要壁藏遺編仰止高山想卿  
盤旋武夷九曲堯夫百源光霽灑落若寄丘園爰  
命邇班酌洞齋芬靈其顧享啓佑斯文

明陵親祭文

昔歲辛丑中秋月望乃生聖人維新邦命皇  
祖展寢粵在周甲仍登貳極遂基洪業不匱



之思小子是承來瞻象設舊曆重丁撫茲年時怵  
焉感慕仰想流虹俯愴墜露 仙遊縱邈 聖澤

彌長永言鴻烈於戲可忘湯降不遲文德孔純止  
孝止忠以敬以勤誠深問寢禮遍謁 陵追復

桃主前烈增光志繼尊攘感結風泉爰劬 皇壇

義問昭宣體乾不息事帝如對徵風問雨一心靡  
懈晷食思耕宵衣念績扞災恤隱匹夫咸獲猗茲  
德業寔由典學工極明誠化洽家國長秋正位日  
月更新舟水揭圖股肱同寅闕典皆舉靡義不獎  
聖廡正序賢祠特享褒崇六臣表章三忠臣服受

縹一洗陋風宏綱畢張大猷斯陟不顯其謨是用  
燕翼皇矣善述圖功克終壽考作人五紀齊隆嗟  
予繼序罔克宥密踐位行禮恒懼墜失文教既頽  
士風漸萎曷由振勵適追弘規誕節再屆羹墻  
采切曩拜元陵已告秋謁是日伸誠曷任遐邇  
矧惟文母禮遵周祔思齊之頌民庶攸同名門  
毓德坤載齊功靜慎其儀履艱愈貞南樛綏福桂  
魄重明曰予良佐聖訓有煌舟梁復成徽音  
繼彰治隆中壺養尊東朝深仁盛烈彤管永昭  
策决建儲慕深斯歲三宗一語遺黎尚涕同茲



兆域永鞏千億周旋欄砌儼然如覲緬懷長發肇  
自電樞睠彼黔巖亦屹龜趺惟茲令辰景貺必滋  
尚荷神庥復膺純禧清酤既載有飭斯香陟降  
其歆曾孫之將

紹賢書院致祭文

天啓斯文厥有大統聖作賢述前周後宋有卓夫  
子私淑二程嶽峙海涵王振金聲造道有要曰惟  
博約孰云尊性而不待學道茲格致昭厥本原竹  
牖向陽方塘有源動合繩準知析毫絲不躡不歧  
正路孔夷盈科詣極德盛業茂萬物皆備百官其

富浩氣充塞大筆鋪叙會撮今古釐綱整緒箋註  
失旨經訓舛裂直罅闡奧揭茲日月袞鉞錯施亂  
賊恣橫誅僭黜偽扶我倫常或禪而呌或史而駁  
餘禍雖烈尚幸辭闢時危漏船澤閔寒泉施在後  
人遺教式宣末學知方姦諛有畏道與書存人紀  
永賴自我先王敬信斯篤成教于國戶習人讀  
間生賢俊奉規弘功丕彰儒化不其道東嗟予生  
晚受賜尤大徽猷精義手鈔心會不有嘉惠孰開  
蒙鄙恒懷慕悅如對卷右瞻彼首陽有水九曲於  
焉揭享文成之塾前乎文成有趙有李趙正其趨



李篤其履文成繼作洞見天人誰其德鄰文簡克  
醇文元文正接武振響禮有據守義秉尊攘是皆  
傑然為夫子徒千載如昨萬里非迂次第升配儼  
若列侍額以紹賢 先朝攸賜亦有典禮時薦苾  
芬予茲興懷替遣近臣齋予明誠拈予辦香靈其  
顧歆啓佑無疆

東耕田觀刈前一日先農壇攝行告由文

帝作耒耜民始知農重本之祀萬世攸同耒耜或  
或洵荷神功載芟載穫載祝屢豐潔我圭瓚黃流  
在中

右神農氏

皇矣豐烈邵籙縣縣司嗇作稼古今民天維麥孔  
碩貽我有年恭奠泰尊崇報式然躬戒劓銓告儀  
是先

右后稷氏

祈雨祭文

壬寅

予愆于德天不降康比歲多饑今又亢暘已矣來  
牟將病禾稼陰雲乍交赫日旋炙惟瀆是懼默禱  
則久民命既近曷不求救巍然國望實庇我人庶  
賜甘霑其應孔神



右三角山

咨今之旱自春徂夏我憂孔殷不寧夙夜亦既無  
麥猶望有秋甘澤終闕枯苗曷抽災不虛召予固  
知咎哀彼無告神其不佑惟嶽作鎮瞻依最邇尚  
賴膚寸一雨千里

右白嶽

有山惟截邦人所瞻相彼朝隲膏澤是占胡茲苦  
旱尚靳嘉惠縱予不德民則奚戾我麥既歉我苗  
則枯救焚之急晷刻是須默禱靡應昭祀以籲一  
霈其亟八域孔溥

右木覓山

漢為國紀百川攸宗滋枯沃渥寔主玄功惟此亢  
旱涸我田疇咎雖在人亦作神羞登場之麥不救  
春飢若又無秋民且靡遺我心如熏幣牲亟走及  
茲滂沱惟恃冥祐

右漢江

再祈雨祭文

江以龍名繫神之宅騁靈利物厥施斯博災降大  
地亢曦赫赫百姓魚喁四野龜坼秋種未入暇論  
二麥匪穀曷民匪民曷國念茲咎徵職道否德澤



闕下究誠茂上格默數愆尤責豈止六浩無涯津  
涉大川若卿士大夫莫我肯告無曰既雨車薪一  
勺心之灼矣雲漢邈邈不于明神云何控極官倅  
槐棘心随圭璧願起潜珍亟錫膏澤

右龍山江

蒼然楚望在水中洲自昔冥應若鼓之桴胡寧瘖  
予久閔神庥一早三月野停耘耰無苗不枯無麥  
可收南囂北呻甫撤乾餽失今不雨將汝盡劉環  
東黎獻其憂予憂咎在一人孰怨孰尤潔我牲幣  
靡祀弗修昔需崇朝曾不盈疇方寸之得敢匹

先休睠彼漢流黜雲尚浮可膏而靳亦神之羞一  
幹玄機八方占秋永言裡享無斁有疇

右楮子島

雩祀壇祈雨親祭文

秉德惟仁宅位于東啓發庶彙寔荷神功驕狻肆  
虐彌月煬烘何草不黃蚤翳晏風究蓄之祟率道  
寡躬胡厲于民若已之恫我將我享冀格我衷一  
霈毋慳千里其同

右句芒氏

維神養物宅位于南滋之液之冥庥斯覃今胡斂



膏月已踰三既杲以風乍浥旋燁銚鑄莫舉寢殮  
奚甘匪神之尤不辟是慙躬蔽吉蠲控我焚悵亟  
垂甘澍俾濡俾涵

右祝融氏

博厚配天皇矣后土慈育之化厥施孔普亢暘為  
沴密雲不雨曷播曷耘五種俱瘠胥矣寡昧重連  
瘳怒咲彼窮惸寧靳顧祐曰稔曰荒靡神孰主我  
來代犧冀蘇我祿

右后土氏

執矩出治宅位于西平秩之功侯莫與齊涉春徂

夏雨未洽犁麥瘁苗痿田卒蕪藜咎在一人胡忍  
黔黎靡遑是食如履夏畦有感有應神豈予睽庶  
其錫霈答此秉圭

右蓐收氏

坎為物歸宅位于北寔宰雨潤玄功沕穆今我病  
旱亦云其亟已矣薺麥尚及種桂下土耗數諒予  
不穀遑數已郵不忍民瘠救茲焚渴惟恃水德我  
醑載潔以祈優渥

右玄冥氏

俶司稼穡皇矣后稷萬世烝粒繫后之德胡茲苦



曠瘁我嘉穀民其轉壑神亦何宅瞻仰昊天憂心  
如灼云誰之辜辟而不辟出齋于郊來薦圭璧冀  
蒙靈庇亟賜膏沐

右后稷氏

南郊攝行祈雨祭文

噓發鼓潤同功異施曠之乾矣閱月經時油然乍  
屯淒其旋隨已聞殷殷未見祁祁予啓予讐政實  
多疵神其監恕降霈不遲

右風雲雷雨

維融維結靈著祈禱凡有控款羣望咸秩自予邁

旱願藉冥隲無麥無禾民命將汙惟神孔仁寧莫  
我恤歆此馨香亟騰蒼蔚

右國內山川

神維毓靈鎮我墩隍發禎捍沴永護宗祊胡嗇  
于今致茲恒暘咨彼何辜職予不臧夙齋明祀元  
輔替將幸垂幽祐錫以穰穰

右城隍

先農壇攝行祈雨祭文

維帝教耕稼穡伊始萬歲穰穰惠莫匪爾有或不  
熟神其無恥穀朝祈稔虔薦簋簋曷不予歆災莫



肯弭咨今國旱罔有遐邇不毛而塵普土如燬農  
夫野泣抱鉏廢耔予思子愆恫實在已微誠未格  
天其邈矣敢曰得雨測不盈尺于帝有丐先祖  
是似喁喁涸魴惟仰斗水亟賜一濡溥洽千里

右神農氏

惟后粒民寔司田功于社于壇祀秩孔崇凡有控  
極惟后是宗曷其珪幣獨後先農咨我下民罹此  
蘊隆甫田皆圻穡事靡終咎由一人我心忡忡昔  
將雩祀代犧以躬敢忘神賜是夕驟凍或北或南  
而不洽同譬彼行潦莫救原烘旋修禋享再竭微

死聖集卷之四  
三十一  
哀如水在地于何不通冀垂大霈亟活吾東

右后稷氏

社稷攝行祈雨祭文

社與國立神實治茲惟土惟人匪予所私災惟神  
降澤惟神施神何予怒祈穀孔時三月不雨二麥  
既萎迄可蘇矣壹以暵之節屆金伏期失秧移畝  
畝甫田滌滌亢曦抱耒收鉏下民其咨無禾為食  
溝壑則宜予念茲艱憂不可支診豈無召咎固自  
知將昭厥戒燠最京師不腆其誠需慳代犧神非  
難謫罰亦奚辭惟是不忍予愆民罹赦斯恤斯猶



仰神慈神苟失依孰供明粢嗟惟大命近在睫眉  
亟垂甘澍罔俾靡遺

右 國社

有嚴神后克平九地求福報功前志攸記自我肇  
祀靈應恒至涵育無疆羣生畢遂孰闕其惠驕魃  
為祟虐炎四煽甘澤壹闕池涸魚喁林焚鳥墜田  
坼秧枯農輟其事哀我赤子亦孔之瘁無麥可鑣  
無禾可穗俾爾盡劉夫豈天意災祥有徵否德攸  
致遍籲微忱尚靳神賜一雨不周六責是愧以朝  
以夕愈渴予企若又失今望絕耘蔣民之填壑逝

將立視國固靡恃神亦奚利陳祀北牖我誠攸萃  
庶其滂沱沃茲焚熾

右后土氏

稷為穀長寔主我稼尊竝大社廣敷玄化凡厥

黃茂神佑是藉為酒為醴不替報謝今春之旱迄  
茲季夏赤土生烟杲日可怕或霏或凍亦祗以乍  
麥穗鮮粒秧坂如炙袖手徊徨農功休罷哀彼民  
命朝夕以假予用憂悸罔敢豫暇想見嗷嗷如臨  
田舍名愆致沴予固知過惟神之仁歛祐則那災  
胡不弭福胡不迓殄此嘉種彼魃胡赦菲幣斯陳



靈庥願借我求云亟爭以蚤夜神之聽之雲車翩  
下呼召風雨沛然而瀉

右 國稷

於皇后稷率育下民誕降嘉種功莫與倫莅茲冢  
土報以精禋凡有災咎是控是陳矧茲一旱已逾  
九旬脩綆艱汲汙畎生塵三農廢輟萬姓嘯呻喁  
喁待盡哀此涸鱗予不遑寧薦幣斯頻南東有壇  
昭假有神以霑以霏靈應輒臻亦知嘉惠奈未霑  
均匪天不監匪神不親而猶閔澤職由一人政乖  
誠蔑謫豈無因恫是無辜同罹胥淪后初粒烝惟

德之純曷俾捐瘠不終厥仁民病愈棘我籲載申  
端賜大需毋踰茲辰

右后稷氏

贈禮曹判書李鎮衡致祭文

卿在人間寄如過客歛歸太空蟬脫其殼獨有忠  
愛生死固結臨化一詩赤腔流出子從貳邱得卿  
為友時維難危昕夕左右卷懷如愚涇不渭濁次  
月三節豈曰酬績沒後勉贈始副常期踈襟爽語  
起予者誰宮筵扶醉俛仰成塵十行一酌表予君

臣



紹賢書院致祭文

癸卯

紫陽應期篤生于庚集儒之粹會聖之精雷開萬  
戶潮吞百川吾道大明星日長懸啓牖後學暨我  
東土人誦周程國比鄒魯祠宇石潭六賢配食如  
水于地不限疆域瞻彼神州河清杳邈洋洋尊靈  
於我無斃閣臣將命敬薦苾芬願言顧享垂佑斯  
文

右朱文公

粵我靜庵關閩正脈純剛之德兼善之學恥比管  
樂期挽唐虞既長烏臺男女分途皇王大治顧盼

指揮竹樹賦鵬奈此萋斐屈小伸大百世攸宗在  
處殿享匪直黷宮吾道日孤曠感彌深遙蔽洞酌  
式表敬忱

右文正公趙光祖

我朝名儒多出嶠南公惟集成大任是擔文章經  
術咸推宗師龍德莫施鳳舉不遲講道陶山戶巷  
泗洙羽翼文成有德不孤出處何常惟義之就生  
同山斗沒竝俎豆嶺祠致酌餘懷起想乃睠西顧  
一體裡饗

右文純公李滉



仰止高山逶迤九曲居因武夷院起白鹿遺化在  
人絃誦比屋豈料亨炏乃反黨賊淩我方幾底  
淪胥自愧不教何咎于渠緬憶高風出日暎若如  
公在者人豈冥摘展也君子九原難作親製數行  
罄我悃悃

右文成公李珥

允矣牛翁氣鍾坡岳家庭服訓麗澤薰德羽儀于  
朝左右 聖祖齊手推車朝暮三五事與心違各  
返初服溪潭迴接講討相續想像惠好如蘭如芝  
恨不同時以賓以師予酒孔旨予牲孔碩齋誠倅

列聖御集卷之四十八

三十一

官尚冀歆格

右文簡公成渾

歲黹緇衣在笥之中云誰之思文元金公黃岡之  
嗣慎齋之補尤翁賢師石潭高弟蹟公繼開其施  
也普淵乎學源沛然教雨禮析絲毫道挈要領窮  
居講討脚踏真境于何得來警我頽俗敬辦清香  
庸替王帛

右文元公金長生

享配 孝廟石題湖阡平生景仰在茲懷川學宗  
考亭義秉麟經氣象喬泰德業日星豈意賢門乃



生亂賊背國忘祖附凶濟惡訛言誤人湖海最毒  
靈如有知必先誅殛如拇割駢在公何損將祭華  
陽罄竭予悃

右文正公宋時烈

華陽書院致祭文

僂僂 皇靈萬東之霄桂林享舜楚鄉祭昭緣情  
義起俟百無疑陪臣院享隣近其祠公維間氣大  
賢東方義則春秋學則紫陽淪彞絕學賴以不墜  
予實興慕配 廟題隧德賊藉蔭玷辱家聲誤加  
虞旌反資寇兵表裏權姦受嗾投匭讎我內治沮

我大計反註四字以訛以煽聚首發通幾汙斯院  
殲魁赦從罔或感憚澤泓逞凶仁京謀亂千歧萬  
徑同轅一轍公而在世手先剿絕禹山作逆博陸  
無愧侂冑亂國魏公何累矧予尊尚終始無斁中  
心是聲明靈庶格

和順貴主致祭文

猗我王姬曷不肅雖有烈伯姑益光吾東其儀淑  
慎婉婉在宮謙和形外貞信由衷擇對名閥允矣  
賢尉敬禮無違不挾其貴外內諧穆夙有涇渭婉  
其平日溫王柔蘭毅哉一死松勁竹寒匪殉于情



惟節是完雙和就穴匹庶猶難共姜誓志伯姬焚  
躬我姑兼之事殊心同表章有待綽楔斯崇芳名  
永揭沁水無窮憶在穉齡及見顏範琅然環珮尚  
自依黯崇獎奚有於予心慊式薦菲誠清酒有湛  
和平貴主致祭文

我家有法誼惇天屬最於仲姑有懷其德其德維  
何孝友根性不煩師氏盡愛盡敬謙以牧己仁足  
感人組紉閒靜環珮逡巡 寧考曰嘉寵愛莫加  
諸母諸娣罔不湛和雖其降嬪無間在宮宮闈雍  
雍藹如春融穠華之萎在歲戊辰豐畀嗇享天果

孰親母曰婦人實關王室苟其在世豈若今日語  
到徽範 慈宮猶涕嗟予生晚音容莫逮不忘者  
在雖遠敢忽長主之門有卓綽楔因茲興感茲致  
洞酌靈其不昧庶予歆格

洪奉朝賀

鳳漢

致祭文

嗚呼公之歿今幾霜矣 慈宮之哀慕深深則予  
小子亦豈忘且嗚呼公嫺於政事習於典章久居  
廊廟誠款茂著公議不能掩其長也中間事變不  
須追提而今公之家不京而鄉公若在世豈至於  
是撫念疇曩益不禁其愴傷爾嗚呼使冢嗣而出



宰奉祠版入城此予所以以親心為心公之靈亦少慰於冥冥耶茲因興愴替奠一觴不昧者存庶幾聞予言而察予情

諭善朴聖源致祭文

予在离宮實資僚屬英考詒謨峻厥遴擇卿時挾冊職乃諭善曰予有為昕夕勤勉天人性命子史經典酌古參今毫析縷分日昃花輓遲遲歸院雷肆藝游非乏羣彥得卿以來若消鄙吝佩服良言實踐體認輔導之力伯仲于南錄孤承蔭豈云恩覃欲酬之功庸侈殊賜冢宰之秩文獻之謚敦

孝新編寔卿一轡剖劖壽傳補世不淺九原可作  
有感無慚一酌侔奠予文在函

洪奉朝賀

鳳漢

致祭文

惟公安擢龍門毛傳鳳穴氣度端凝丰神秀澈騁  
于天衢逸足無關華藻彪炳利器剗割理財詰戎  
厥有功實女貢蠲絲丁役減匹仁政之施亦效承  
弼縱有異論莫掩勞伐事變既荐滄桑易閱母曰  
同氣征邁殊轍累顧何有親以義減惟是末年多  
疚尠悅肆我慈宮哀慕深切親心為心增予  
哽咽苟係義理其防有截情亦可伸恩豈容絕冠



帶嗣孫促入禁闥宅命京搬享俾官設於公與私  
罔違罔缺公靈儻慰我懷有怛爵雖替莫言由中  
達不昧者存庶予歆歆

參判洪樂仁致祭文

嗚呼處紛華之場而性度澹泊長驕貴之家而文  
詞贍博蓋衆人之所難而公獨得於天而易為力  
故常淡然有以自娛非聲色勢利之所能易其視  
世之蔑學識而驚機伎者相去不啻十百是宜享  
有遐壽而顧中年之不獲豈不以階庭蘭玉必先  
受風霜之摧剝嗚呼予自幼少間疑辨惑於公為

多不可謂之無所得則不但渭陽之情故日月雖  
遠尚不禁傷今而懷昔頃使公之子守榮起居  
慈宮仍畀以一縣此予伸恩之一端公儻有知於  
冥漠嗚呼公若至今在世必使事變無作脩短命  
也興替理也而公之曠懷亦未必釋然於斯予安  
得不重為之悼惜茲命替奠庸敦衷膈言則短而  
意長庶不昧之歆格

奉朝賀南有容致祭文

卿於寡人實兼盤說至誠訓迪終始如一諄諄牖  
蒙不激不驟兩儀四象手指口授自從文字勉予



立志曰帝王學與匹庶異主經翼史博約會通為  
傳為賓披腔輸衷逮卿騎箕比川無梁臨筵緬想  
何日可忘卿姿近道餘事文章陶性薰德若宣宮  
商受用不盡御于家國紀功太常義謚乃錫軫祀  
錄孤曷云稱情遺稿三復恍對儀形文以弁首鋟  
梓布廣元良定號孰膺輔養伊人之思寤寐杳切  
倅官奠筭辭則躬綴

參議俞彥鏐致祭文

山以玉輝澤因珠媚矧茲賢士邦國之瑞自爾騎  
箕衡泌遂空緇衣在笥伊誰與同慨予企佇七八

寒暑操確守丘學篤尋緒衆卉壇變谷馨矢葆人  
推醇儒世挽吾道縻爾天官屢勤弓旌思延席虛  
待質經橫時來弟鎬俾達衷曲期以春和恐妨調  
息介石莫回少微先索鶴髮在堂靈應躑躅扶植  
無人奈此頽俗竟使沒野予有媿色

直提學沈念祖致祭文

原任奎章閣直提學沈念祖出按海西以疾卒于  
官念祖予近臣也計聞予甚惻傷之遣屬閣官校  
理柳煥德祭于其靈曰人之卿知疇若予詳人誦  
賡博予喜端良誰昔夜筵一言悟契卿時挾筴曰



左翊衛踵冠黃甲代聽之初盛之瀛奎視以瓊琚  
退公蕭然五車百家俾作掌攷洵莫與夸詩情酒  
戶爾雅跌宕扣其所有奚適不當煌煌金貂亨衢  
之步自餞于卿予寬西顧卿來無徐春以為期荷  
堂宵夢幾繚鳳池曾不少留以樞而歸計到輟食  
竟夕嗟唏有子克肖餘不食實文以酌之詰朝馳  
駟卿靈尚其歆于茲時歲舍癸卯十有一月癸丑  
諭祭

列聖御製卷之四十八

列聖御製卷之四十八

三十一



列聖御製卷之四十九

正宗大王

文

宣武祠節祭文

甲辰

粵在龍蛇島夷荐食 帝眷東顧一怒斯赫桓桓  
司馬濯征無敵奠我琮璜復我封域報德以祀酒  
馨牲腍星迴三甲江流萬折拜墀餘懷無地可淺  
公享卜吉間以一日四字華扁百世精苾神哉來  
格文予親綴

右邢尚書玠

屹彼三壇繫苑之北享舜桂廟祭昭茅屋亦粵  
楊公祠曰宣武一體君臣永藏東土公像在中  
穆陵攸購丁歲偉烈炳朗宇宙維暮之春次第明  
裡載瞻中州潜然沾巾風泉之思寄于蕪辭配以  
猿鶴從與饗之

右楊經理鎬

海昌尉吳泰周明安貴主致祭文

睠惟公家赫赫簪纓教傳詩禮義篤忠貞懿我明  
安終惠且溫聖祖曰嘉擇對名門唐華執敬禁  
臠思謙外內淑行洵莫與蕪沁水鐘鼓百篇在吟



宸翰賡章照暎詞林佳子肖孫步武明廷後屬雖  
踈尚想典刑卿月新榮式賴餘慶侑及先卿文躬  
薦倩

慶恩府院君金柱臣致祭文

予觀戚畹鮮能有終賢哉慶恩處貴以恭塗華祥  
叶馬鄧譽并篤生 聖后曰嬪于京 皇考建儲  
寔賴 慈旨在宋宣仁有周妣氏公廼密贊炳然  
丹忠磐石泰山伊誰之功 臨第賜詩尚記 恩  
遇舊甲重逢曷任愴故餘蔭及孫亦追 先志靈  
如不昧庶歆斯解

英宗大王 貞聖王后定尊號日 真殿告

由文

猗我 聖祖陟降在天眷顧篤棐寶籙繇繇託重  
震鬯禮新禹筵有喜輒告於萬斯年

右一室

寧考庇庥佑我後人邦慶無疆舊甲依辰國本永  
固顯冊僉詢縟儀將舉天休用申

右二室

景慕宮定尊號告由文

小子銜恤凡幾年斯無時不慕有喜亦悲如窮無



歸奚樂為君誠伸 廟貌禮虔苾芬 顧復之恩  
曷足少酬俯仰靡逮子職莫修顯親報本匹庶攸  
同孝養千乘莫慰 慈宮再進 瑤牒儀未稱誠  
欲叙區區采增煢煢餘生報答只此事已新秋吉  
日冊我元子天休日臻邦基永奠毓慶發祥 先  
庥是闡即日展省有淚沾臆庸伸告儀冀垂臨格  
祈晴報謝祭文

維神宅嵎平秩東作田祖報賽自古在昔農夫之  
慶土鼓苧籥甚雨痒稼不能錢鎛薄言徃籲日月  
于壑既晴亦佳洽此膏澤溪毛行潦迺陳洞酌

右東方山川之神

恭已面南寔徼神惠時潦警予肅將牲幣裸薦之  
夜陰雲乍霽籩豆甫徹月明星綰偕我士民樂此  
豐歲報以精禋非循典例象叶重离永佑承繼

右南方山川之神

秩宗典祀望于西方有事輒控曰雨若暘大有著  
徵極備乖常瞻彼田疇秋水浩茫俘來秉珪日出  
之光暖昺鼓舞歡聲載颺迺侑醴醴俾也可忘

右西方山川之神

澤二炳靈天一垂功篤佑民社我稼攸同七月迺



雨八表濛濛澮澮衝齧小東大東誕舉崇祭天乃  
反風國之上瑞寔維屢豐圭璧覲好庶鑒予衷

右北方山川之神

洪奉朝賀

鳳漢

致祭文

自公云亡倏七易歲居諸已邈音塵永翳恩怨雖  
冷脣舌猶沸俯仰今昔予懷曷既嗟卿立朝勞勩  
可紀身佩重務事多定制晚歲不幸遂遭困滯情  
則可諒勢或由掣若丙申事尤非卿累於國不臣  
在家豈悌始初分門判若涇渭雖曰近出何害斷  
義肆予有言譬彼跖惠王導之勤不以敦廢今茲

大慶 慈宮攸暨不有推恩曷云養志絲綸既下  
昭釋備至瑕玷一洗易名可議矢辭命官以告以  
祭卿若有知庶慰長逝

鼇興府院君金漢考致祭文

卿之為國舅猶 肅廟朝之慶恩也我 慈殿之  
保佑寡躬猶 仁元聖后之於 先大王也然而  
慶恩家與國咸休其子孫安享祿位卿之一子名  
在罪籍身竄海島此奚但卿家之不幸抑亦朝廷  
之不幸也嗚呼予寡躬賴 慈殿聖德得有今日  
之慶貳極之冊禮斯舉八方之歡喜攸同不於此



時推恩於卿子豈予所以仰慰 慈殿而為卿家  
地乎茲乃誕敷絲綸頗加昭釋俾之移配處陸道  
里差近卿之靈其果有知否至於辛巳事雖非白  
簡所登而為世攻斥之本實在於是故今此提諭  
亦出於明其事實無他之意卿之靈其亦有知否  
嗚呼全保世臣即予苦心而況於戚畹況於卿家  
乎當初行遣既非得已到今酌量良亦非偶親製  
此文祭告于卿卿若有知其必有感於斯矣

永陵親祭文

先休篤斐濬發其祥迺啓迺佑克熾而昌載涓穀

朝禮舉主炤儲冊誕宣天宇昭朗磐泰鼎呂宗  
國以奠丕惟曰慶皇考攸眷周儲受祐堯牆寓  
慕鬱彼松柏有沆霜露龍旂倣裝祗謁珠丘大  
禧是承王瓚黃流

文烈公朴泰輔致祭文

卓彼忠烈日星吾東尺疏扶綱百世樹風坡山之  
院三節祀同桐鄉遺愛鷺江餘躅駐蹕緬懷倅官  
替酌

忠肅公李世華致祭文

炳炳高風萬夫之特節如孤松堂宜雙柏扶倫大



義懦夫其立一院俎豆百世矜式俾官替酹酬以  
尚直

忠貞公吳斗寅致祭文

屹屹坡山凜然忠節尺疏叫閭寸腔瀝血扶植綱  
常繫誰之功前月致侑益感予衷替遣公孫三忠  
祀同

紫雲書院致祭文

公倡絕學優入聖閫發前未發四七精蘊一部輯  
要聖祖垂袞廟屋持持大坡之原配食伊誰曰  
有文元篤學敦禮紫陽淵源亦粵文純曩躋侑列

反聖御集卷之四十九  
著書既博賾微亦切有秩銅簋黍馨醴潔凝鑒曠  
感近侍替酌

坡山書院致祭文

真儒集成一門咸萃詩禮家傳道學世類籩豆并  
殿廟貌翼翼薄俗起敬行者輒式入境駐輦倅來  
替酌

參贊白仁傑致祭文

昔卿挺豪山河間氣劄䟽樹立滿腔忠毅一院三  
享寔同賢朋清秋動蹕路出坡陵所懷如何有酒  
孔多



洪奉朝賀 鳳漢 致祭文

曩歲秋幸歷陳菲酌瞻言增愴俛仰如昨既官公  
孫又命公謚豈徒予意寔推 慈志不昧公靈尚  
照此心內侍替奠庶幾顧歆

參判洪樂仁致祭文

跡卿平生詞翰蔚有舅甥情厚甘盤契舊前年致  
侑備叙衷臆先公贈謚萬事成宿鬱彼高阡松梓  
路過遙薦薄觥感懷孔多

和平貴主墓致祭文

鬱鬱坡阡貴主幽宅沁園遺芬肅雖其德 皇祖

之臨宛如昨日駐蹕瞻封愴慕采篤中使替奠庶  
歆斯苾

忠獻公金昌集致祭文

卿樹嫖節在昔辛丑忠炳聯劄功贊建策彼不逞  
徒力戰大議謂天可誣敢撓 儲位鍛織媒孽禍  
惜大臣曉雞霜角百越蓁蓁曾不百年國是大定  
聖祖初載掃蕩烏獍日值依辰星回舊甲撫時增  
感迺奠酌

忠文公李願命致祭文

緬惟辛壬餘六十年咸池捧日砥柱擎天竝武黃



閣委身 蒼邱我如月星人為氛翳一死之辦萬  
世之基在卿奚憾死有榮時竹帛垂褒簡牒煌煌  
今歲何歲風烈愈光彼婉孌者視此昭鑑倅來奠  
酌表予曠感

忠翼公趙泰采致祭文

粵在于辛國勢復隍城孤布廷家髦遜荒端明十  
䟽髮白衷丹慷慨正笏 宗社泰磐凶黨抵隙大  
義漫漶變起門墻忠逆迺判嶺海斧鋸如蹈樂地  
天道訕伸百世以俟堯甲重屈往蹟昭森茲酌于  
廟諭我紳簪

忠愍公李健命致祭文

殺身殉國君子曰仁百世一有卿實其人西槎銜  
命北門煽禍陰陽以類玄黃于野讒夫舌簧負塗  
躑躅隻手扶社繫誰之力天經地彛賴以不湮  
太歲闕逢如隔茲晨精爽上升左右雲鄉神之  
來思有酒馨香

忠獻公李廷燭致祭文

在昔庚辛宗國一髮卿先投袂叩閭瀝血尺疏  
懇懇豫建之謨磨牙鼓吻憐彼凶徒毒鋒如蝟大  
節彌彰扶昇太陽四表被光一介孤忠百世偉蹟



此日非偶庶傾我爵

達城府院君徐宗悌致祭文

曰惟國舅毓德高門粵自忠肅克濬其源篤生  
聖妣迺嬪于京塗莘播譽馬鄧齊名 皇母翟儀  
舊甲重屆是年是日基我萬世緬憶卿孫采增傷  
盡俘官替奠庶歆斯酌

璿源殿酌獻禮祭文

於穆 太廟躬薦芬苾 英考誕辰適屆是日祗  
上 玉冊曠禮肇舉今茲篤慶 陟降攸佑事光  
揚 先意切報本來謁 真殿庸寓微悃

社稷祈穀親祭文 乙巳

赫赫 太社奠我東土自古有年既受多祜月正  
元日時維上辛祈年孔夙粒我烝民敢曰常儀采  
薦菲誠神其降監永垂豐聲

右 國社

克配冢土於皇明神參坤澤厚育物化均迄用康  
年匪今斯今嘉平三白已驗天心清酒既載駢牡  
亦備屢豐之慶與萬民冀

右后土氏

田祖有神猗歟 國稷既貽我年又裕民食除宵



親裸豈敢憚勞墁簎九成月星明高多黍多稌豐  
年穰穰萬有千歲禴祠烝嘗

右 國稷

思文后稷允矣農師播穀降種頌登周詩凡民鼓  
哺萬世誰功南畝相宜西成告豐罔以屢登少懈  
祈歲大有占慶神功永賴

右后稷氏

景慕宮酌獻禮祭文

小子銜恤升四星霜瞻依 闕宮觸目羹牆璇杓  
初轉 虹節載臨齋誠躬詣曉日在林周旋入戶

儼然如覲絃誥酒馨俯仰沾臆

直提學鄭志儉致祭文

詩不云乎豈弟君子如玉其人惟卿見已文章經  
術談論風儀跡卿平生何適不宜接人以誠處世  
則淡愛憎親疎靡有怨憾念予契悟疇昔离筵丹  
墀兩策咸曰得賢王堂金貂羽儀明廷把杯揮毫  
撤燭橫經殿壁宮屏半是遺塵奎閣華銜官不愧  
人片言單辭資益弘多賓席詞垣非卿而何往歲  
秋幸德水川邊路次相逢伊後病緜諄諄夢嚙玉  
樓楓宸輟食嗟唏似疑非真生順沒寧夫復奚悲



所可惜者伊公匪私卿云未酬予實難忘癯容緩  
步如見翱翔數行侑詞嗟不能文靈想不昧儻體  
慙慙

先正文純公李滉致祭文

維嶠以南淑氣磅礴地闢鄒魯俗比閩洛挺生大  
賢丕闡吾道姿稟中正志挽淳皞程規朱範海涵  
地負羽儀王庭王珮瓊玖卷懷陶山左右墳籍蘊  
發四七功施千百牖我昧蒙時雨其化四方仰德  
一域親炙家孝戶弟塾誦黌絃遺風起人歸祠秩  
籩予懷典刑寤寐純儒劄玩六條屏揭十圖繪居

寓慕致酹興吁於何得來秉燭昏衢伯兮聯芳太  
常節惠一門竝峙不顯亦世事若後今感實曠昔  
卿靈如水庶歆洞酌

康陵親祭文

皇矣我祖圉世聲明笙鏞賁治菁莪育英二紀  
魏煥堯章舜韶啓佑燕謨陟降於昭龍飛舊  
甲會丁今年小子來將有秩豆籩

文忠公金尚容致祭文

東方名相大明忠臣輕捐七尺寔扶彞倫南樓  
烈焰輝暎竹帛有辭天下俯仰無忤沁流漾漾尼



岑我清風襲人不磷不磨彼二人者何心負國  
芳臭之分婦孺亦識砥柱屹瀾老柏凌霜百世以  
竢萬夫之防匹美孤竹有弟文正一生一死日星  
名僅祗拜北苑暮春十九英靈如水儻 帝左右  
風泉之思覃及忠良卿孫銜命毋吐予觴

永祐園親祭文

仙寢孔碩密邇東岑省趨月迴感隨時深奉 冊  
纔秋拜 園遲今終年纏慕一日慰心清朝薦苾  
陟降如臨

永祐園後麓拜峯山補土告由文

昨拜 先寢峯名曰拜選吉始役佳氣炳蓋

景慕宮親行朔享兼告由文

朔望躬享寔稽舊典矧逢今月孺慕莫展祇告修  
龕兼省薦禴齋宵瞻依少紓衷臆

敬陵來龍補土告由文

小子秋幸祇拜 仙寢局內補土亦已躬審廼召  
禮官亟完亟修前期薦享虔告事由

明陵丁字閣階石修改告由文

皇考孝思小子欽承新秋展省祇拜 仙陵齋階  
少仄敢緩齊整倅官虔告感慕采永



弘陵碑陰記親書來龍補土告由文

曩予秋省松柏濡霜禮舉補土慕深見墻

豐碑

有儼翼翼龜簷躬寫寓誠仍舊增瞻穀朝始工儀  
物備修惟億斯年佑我申休

先正文純公權尚夏追配考巖書院致祭文  
有山曰楚惟湖環之自廟文正望于南維予在童  
丕寤寐伊賢真正英豪得之遺編 皇朝逸民朱  
門忠臣統宗會元遂扶常倫氣象嶽峙造詣海涵  
百年乃定世誦尤菴壹是之準學焉則師龜圖馬  
書逝矣今時高山景仰寔體 聖祖隔晨曠感若

朝暮遇靡典不舉載崇厥報庭侑 太室祠揭大  
老曰有賢弟衡蔡匡顏枕林秋夜星斗闌干執手  
傳鉢一箇直字有光茲土斯文不墜人情神理可  
胥無遠衿紳叫闔何聞之晚乃選吉日一體裡享  
地慣筇屐席疑函丈德鄰不孤儀備罔缺吁予是  
舉寄意也切式表日星以牖衢昏近臣替酌尚歆  
洞鑄

右文正公宋時烈

泉以醴馨山因岳尊乃得文純于先正門篤厚之  
行戰兢之工依歸大老東海之東如引鍼磁若宣



宮商學本內聖義兼尊王由堂入室洞觀性命伊  
川赴涪西山度嶺蓁蓁百越蜃雨蜚嵐蒼黃一夕  
永催箕騃長跪承教吾道有託人參三才其理曰  
直書劄考亭廟起華陽責大後死受言心藏一身  
擔負九鼎大呂造次必於遂統遺緒朱道授黃孔  
學傳曾秋月寒水源流皎澄有辭無愧歸拜先生  
佩服遺訓咸底于成楚山增重秀氣如洗是鄉是  
祠是師是弟禮舉并暇人士攸同聽爾多士躋彼  
明宮緇帷曉闢閭侍宛若一室兩賢百世無斁

右文純公權尚夏

和平貴主致祭文

懿哉令姑 皇祖鍾愛銀潢王質女士壺內喜供  
龍樓音諧鸞絃沁水亭臺花樹春鮮既孝且悌  
兩宮調護在今難援功實罕古宜爾純嘏乃嗇之  
報中間悲愉星三十度都尉無恙庚回舊甲子懷  
恨恨感撫宿昔詩以介壽華髮韶顏中涓替告崇  
醴于盤

東關王廟御筆碑新建告由文

廟門肅肅罇罍薦誠曷以崇報莫稱微情螭首紀  
功以永千春庭輓鋪新亦及良辰



南關王廟御筆碑新建告由文

英爽百代若偏一邦 三聖疇德穹龜有雙仍廊  
設閣煥修楹楠牲醪肥潔永垂冥隲

永陵碑石改豎碑閣修改及伐木告由文

仙陵有儼慕永羹牆翬閣塗丹龜碑綃黃松柏蒼  
蔚略屏繁枝於萬斯年佑我純禧春官選吉誠虔  
告祇

毓祥宮酌獻禮祭文

天眷有德篤生 聖人溫恭淑慎懿範式遵長發  
休祥克昌來昆仰惟 寧考孝思彌敦五紀羹牆

四時烝嘗仲冬此日每覲 躬將寶甲肇元星周  
舊躔 恩深啓後誠切述 先尊彝孔嘉酌彼黃  
流明香上炷有申斐休

宣禧宮酌獻禮祭文

丙午

緬懷 懿範垂佑無疆煌煌誥命夙膺 寵光運  
屬亭午星回舊甲月正展省兼薦洞酌

英陵局內補土告由文

猗我 英祖運撫五百有虞授受有周禮樂正音  
訓民璣衡象天統接千聖功覃八埏亦粵 文母  
垂範內則煌煌銀篆誕膺 寵錫姚華塗莘不顯



其光觀德于廟啓佑無疆曩拜 仙寢餘慕憧憧  
裡薦涓吉畚鍤肇工徃哉汝欽司空宗伯有儼  
珠丘永鞏千億

禧陵攝行祭文

思齊 文母 聖祖賢妃煌煌玄統穆穆青闈文  
定厥祥琴瑟鼓鐘毓慶塗山篤生 仁宗中興之  
治壺助弘多謂宜萬年永迓天和宮壁瑞夢國人  
齊悲 兩寢相望 孝思是追緬惟 懿範感懷  
彌長恭薦苾芬冀歆洋洋

孝陵親祭文

宜無間然烝哉 仁宗於乎至德曷以形容千年  
聖作王燭挽三深仁厚澤率普遐覃胡遽周夢空  
傳堯欽與民尚泣世遠恩深 聖母玄功亦載彤  
管攀髯餘思長樂猶歡 仙寢孔安密邇 先陵  
新春祗謁大禧是承

先正文靖公金麟厚致祭文

孝陵有臣曰金學士宮綰古墨盛際繪事千載省  
識筠碧心丹年年七月淚入喬山竹外窮簷楚騷  
蘭倚碩人邁軸君子明夷煌煌鈴印紫陽一編抱  
書徜徉光霽無邊遂倡絕學大本中正隻手三綱



聞者起敬看花王欄左右 仙寢滿腔衷赤泣訴  
敷衽 珠丘躬裡 聖祖誕辰頰仰宿昔愾慕彌  
新閱劫障子雲水同白留後人觀紫斂擊節乃命  
有司乃酌于廟英爽上征帝鄉杳杳

肅廟御製資武侯岳王文山圖像移奉于永  
柔三忠祠時致祭文

猗漢武侯三代上人魚水契合灑落君臣義炳討  
賊策紆恢疆力資大業直接高光鍾山河氣貫日  
月忠兩表訓命以垂無窮有唐杜甫詩史著褒宗  
臣遺像曰肅清高 聖祖凝想十行 宸章後千

五聖御集卷之四十九

百年尚挹芬芳穆將虔揭卧龍之祠英爽降格有  
洞茲卮

右諸葛武侯

嗟哉岳王不幸南宋奮斥虜熾揭大一統走兀术  
易去秦檜難終古志士熱涕沆瀾顧予曠感若隔  
一晨古篋鮫綃有儼精神地之相距萬有餘里歲  
之相遠千有餘禩偉表颯爽今焉海東瞻彼西陲  
秩此明宮予以展之于宮之內載潔牲醴永享百  
代

右岳武穆王



烏虜文山際時不造平生姱節周蓂唐杲燕山柴  
市白日虹貫英魂上征侍帝香案一幅傳神獨留  
人寰雲劫漫漶繪素猶完眉目山河衣帶仁義往  
蹟昭森不待青史有海東流魯連所蹈地稱小華  
祠建淨土選穀移奉公像在堂有觥者卣尚歆清  
香

右文信國公

南關王廟修改告由文

煌煌衮衣敝予改為齋誠消吉虔將告儀

四郊厲壇祈禳祭前二日告城隍文

司天少陰客氣為疹民之遘止辟禳是軫將大酹  
爾徧于四圻號聚如響繫藉冥威

四郊厲壇祈禳日祭城隍文

國有百神宗我城隍惟其所命以災以祥廓氛驅  
癘環數千里胡為乎疹自春伊始二豎乘火羣黎  
抱疴保無札瘥漸染則那一視神人曰予民主印  
山纍纍廣庇新土畢遂幽冥咸歸太和潔幣脩祓  
穀朝于差于以大招廣漠之野至至醉飽釧土尊  
瓦前宵大霈快洗疹瘟俾而耆艾佑我元元

愍懷墓告安祭文



嗟 愍懷嬪德著貞淑配 儲貳尊履陽九厄不  
能者天造命之嗇 肅考乾斷丹書始滌廡儀象  
設維衿之麓土圯沙壅簡日畚鍤距數武原文貞  
攸宅黃廟孔修錢墳新築百靈蜿蜿環拱彌億永  
安斯丘歆我泂酌

懿昭墓親祭文

緬惟 懿範慕由天倫愛鍾含飴頌遺重輪壬歲  
餘慟又彼新阡歷拜薦享彌增泫然

宣禧墓親祭文

繫惟型範允矣肅肅聿膺華誥歲云回薄今來增

傷 二墓入矚虔辦必香時又薦菊

黿興府院君金漢耆遷葬時致祭文

卿在先朝曰賢戚晚託肺腑親放頂踵願自卿  
云逝事有不幸卿於何有不幸亦命予侍 東朝  
慈恩天大 宗國之勢乃措磐泰俾卿而知知與  
為榮玄兆改卜鬱彼佳城有司厥庇曷稱予志俾  
來奠竚尚庶歆止

象山府院君康允成墓致祭文

於穆 聖后業贊胥宇逮我 崇陵禮舉躋祔

壺化之盛禹塗周妣 王跡之興豐山沛水公於



是時大舅之尊毓慶占麓種德發源秋謁 仙寢  
松柏降霜頰昂宿昔俾公可忘爰命宗伯爰訪雲  
裔宰門古隧尚有牲繫有肴崇俎有醴盈觥公爽  
不沫庶歆菲誠

毓祥宮誕辰酌獻禮祭文

歲歲冬烝必卜茲辰不以堯齡或曠殷裡小子興  
慕聿追 先后先后之恩我來裸卣

益安大君

芳毅

影堂致祭文

文武受命有若周召璿潢籍親帶礪功邵左右  
聖祖以奠邦基禁門定策獵筵受卮赫赫勲庸不

顯亦世與人永頌樂且愷悌 列朝褒崇非直敦  
宗子拜 先寢緬惟興龍龍興舊佐非公伊誰在  
臣尚想矧我本文原城故祠彷彿英靈贊像綴詞  
酒潔肴馨

元陵親祭文

丁未

聖祖遺弓一紀于茲 慈覆隆恩彌遠莫追邦之  
有慶孺慕益新矧茲悲寃寧不號旻繇眚之宗綴  
旒其危小子何怙 陟降臨之永言基命將賴冥  
庥攀柏雪涕虔薦醪羞

提學黃景源致祭文



大雅云遠文氣日漓作者中間寂矣鼓吹卿奮厥  
聲規彼大匠體尚邃古言恥官樣滔滔江漢鳴國  
之盛為予賓僚掌予詞命奎署英館卿又其冠曰  
篤契遇不寧才難機變都忘孤卿自至白髮寒屋  
手勘存笥蘭剡香歇蓮榜星迴太平生老酹以一  
杯

三角山白嶽木覓山漢江祈雨報謝祭文

律彼華岑

白嶽則曰岑律彼南山漢江則曰汪彼江漢應捷桴

敲福祉庶民驅厲屏螫曰恒暘若乃二載交畜陽  
不雨即風天爰源泉云涸矧茲确磽咲爾黎獻譴

讜誓誓爰走爰望秉圭縮茅神幔夕張星在樹梢  
屍輪霞旂言駕蒼蛟頰歆稷馨上蒸雲包厥初霏  
微伏靈夜捐浹于城闔遂及九郊我稼既秧我麥  
其苞大有之占慶吾同胞神則終惠至于秋杪高  
無乾燥下有蟠膠載陰載陽一聽神教誕修報祀  
桂漿蘭肴矢言永謝酌之用匏

和平貴主周甲日致祭文

於惟令姑鍾 皇祖愛德邁釐女祉叶歸妹 皇  
祖有言曰孝若友天賦之篤篤乃所有有孚孳如  
亦及微物董家陳門和氣藹蔚匪直也賢塞溫允



常如可詳也我涕其滂春謝沁園殆四十年萬事  
中間吞未敢宣星紀不停晷甲云回薄羞菲誠是  
日侔來

元陵莎草滲罅慰安祭文

甘霖三日封莎滲罅請慰安恨未躬駕

永祐園丁字閣修改時慰安祭文

樑灰滲淪宜亟改修禮舉慰安先告厥由

洪奉朝賀

鳳漢

墓致祭文

噫公乘化垂一紀今五十而慕若慰 慈心節壹  
之惠太常其祀伯舅遺稿內府登梓祿仕聯武曰

守曰寂非予恩庇靈庥是賴曩謁西陵涼露在  
垌交阡入矚悅拜儀型差穀紓誠貞敬諱日咨南  
城尹徃奠芬苾

大老祠致祭文

曩予銘之于祠之石周秩成治武隣昭禴寧陵  
之世曰我大老仙遊莫攀密札在抱柏暗月沉  
何處跪陳地以人顯禮隨情伸噫茲精義千世在  
後匪或私公厥有所受太歲維丁嶽降辰回周三  
舊甲曠百新懷洪河砥柱大冬寒松考亭其嫡栗  
門其宗天之降任肇自是日寤寐崇報敢其不卒



楚山有院華陽有祠譬水在地無適匪宜曷如驪  
湖長近喬山理弗云遐靈必斯安穹龜有屹既磨  
既琢多士考德雲孫相役載峙載享尚庶感通酌  
以大江萬折而東

祈穀大祭攝行創用祝文

戊申

有國則社宗于百神常禋用戊夙祈在辛寅秩  
大祀適追寧人黍稷惟馨金石既陳錫以屢豐  
永綏斯民

右國社

皇矣后土厥德配乾含弘博厚六府資焉輯我黎

元奠我山川百爾所思莫如有年願鑑徽誠歲功罔愆

右后土氏

民以食天司維國稷尊竝太社粒由爾極予愧否德神任丕責豈其待祈禮則孔夙用彰功施俾富能穀

右國稷

其始播穀后稷烝哉相彼穎苞肇厥藝培農祥既正上辛爰曰徂賚大東其永無災於千萬年有秩

籩壘



右后稷氏

永禧殿酌獻禮祭文

誕惟 聖作飛龍御天耆定大勲垂統萬年萬年  
承承載錫之光皇矣來假降祥洋洋

右第一室

聖祖靖邦嘉命宥密武定文昭區宇以謐俾熾而  
昌 日表天臨小子奉璋尚冀顧歆

右第二室

長發之祥啓後光前 八彩孔邇有儼遽延諫吉  
春仲穆將明禋 陟降庭止天休用申

右第三室

神功肝蠻民無能名萬彙陶鎔四紀咸謨宵衣齊  
明明發來覲歆茲芬苾錫以祚胤

右第四室

寤言孺慕入戶儼然如聞如覲如侍尺筵黃流在  
瓚多福是命何以命之曾孫有慶

右第五室

贈大司憲李述原褒忠祠致祭文

大嶺以南餘七十州得一功曹義凜如秋 英考  
曰嗟在唐杲卿廼立之祠褒忠其名廼增之秩惟



都御史死有榮時降夫在市欲說往事士猶衝冠  
蠢醜操兵倉卒叫譴吏投帖迎官棄綬遁罵不口  
絕氣與血噴騰為紫電頰決妖氛有子誓天殯父  
從軍遂寢其皮王師奏功舊甲云回紀勲暨忠即  
祠而祀錄及後裔文以侑酒綱常是揭

### 三忠祠致祭文

昔戊允蠢肆厥猖獗表裏構扇時方泄泄誰其聞  
湖忠武之孫長藪夜黑劒已及垣義重取熊身輕  
擲毛罵賊如狗不死非夫微此一舉民彛其戮巡  
遠樹功不讓李郭賊故甘心必先于卿卿為大厲

殲狼斬鯨廟于故城有秩樽俎揭彼日星咨我士  
女山河不改湑灘重回予讀遺乘深激感懷酌以  
大酒歆哉毅魄尚有英風九京可作

右忠愍公李鳳祥

卿在平時世不識狀佐忠愍幕曰牙門將帕首紅  
韎曄如星髮史觀幼志慨蘇醫雪廢卷縈息丈夫  
有死人於是自知所樹耳洎殉于難賊亦吐舌屹  
如砥柱罵以臊羯孰懷二心往膏其斧疾風勁草  
聖人有詡一言以蔽萬夫之防謚在太常惟忠與  
壯睢陽雙廟式配元帥湖之人士肅欽其義值茲



舊甲紆予愴想桂醕蘭肴靈其顧享

右忠壯公南延年

天之降衷不係世類忠豈貴將烈或側陋幕府潛  
名乃如之人卓其有立古亦罕倫裨於是帥早得  
依歸兵藏柳車勢急油幃卿奮曰我是節度某爾  
速殺吾罵不絕口凶刃如堵遂及節度卿亦隨之  
天地為怒 聖祖崇獎贈小司農彼狐鼠輩都宿  
戎鋒一殉之辨百世之榮侑食兩臣其永竝名是  
日起感事若隔晨英爽不沫想感茲辰

右贈參判洪霖

趙豐陵

文命

致祭文

卿在先朝文武膚功色潤洪猷文古元戎皇建有極時維中台難為弟兄屹彼雲臺江山遺藻行且梓鋟重逢渚灘帶礪興感世宥之義爰及豐原靈庶無憾歆茲洞樽

靈城君朴文秀致祭文

蓋士生國以需危疑古社稷臣卿於似之溢腔熱血格于神明迓續景命繫一介誠先王曰咨無睡則思矧予激感曷禁淚滋于酬于紀期以世世從征之勞而節之細星周舊躔侑以精禋匪直也



勲視彼貞珉

文忠公李宗城宣謚日致祭文

慮國忘家書法曰忠而後允愜匪私伊公所欲詳  
者奈予摧咽堂披寸腔臺瀝苦血中間一著獨許  
神知三月郊居為誰遲遲域罔售情袞有垂褒公  
於奚憾使我心忉騎箕之辰內家飯素曷云少酬  
感則是寓天官宣謚近臣替酌薄攄肝膈想宜歆  
格

文敬公鄭澔宣謚日致祭文

維巖有丈控于華陽屹如柱撐迴彼瀾狂其德不

孤寒水與隣道或顯晦身以屈伸起自投荒髮白  
衷丹尺疏懇懇獍心為寒文清故家展也肖孫洞  
辨國是永光師門大老庭饗卿惟倡議曩予不惑  
實感精義世教日弛斯文靡托責兼君師臨猶淵  
谷老成典刑何處得來式我百辟復見挽回節惠  
常典云始往宣因之侑酌有冽秋泉

宣陵攝行祭文

我家盛際 聖祖之世禮興百年威訖二裔覩天  
曰配不顯 坤儀迺誕 文子再鞏磐基龍旂夙  
戒象設祗省降監徽誠綏以景命



靖陵親祭文

於顯烈祖靖我家邦駿髦彙征鴻化流厓寧  
考維戊親謁仙寢虹渚起慕霜露寓感太歲重  
逢小子是述願推餘慶永繇尔陟

平昌郡右千牛衛李公

公肅

突山郡夫人鄭

氏致祭文

穆廟初載天作之合毓祉篤慶肇我赫業如周繇  
籙自初姜嫄推本所生禮宜精禋錦袍犀帶聖  
祖攸錫逖彼桑鄉尚有舊蹟廼造祠版廼建安宇  
廼命近臣替侑尊酒

寧越六臣祠致祭文

端廟有臣曰維六忠生既竭力死又樹風焄蒿悽  
愴左右 陟降錦湖雲水往事傷心明月孤樓杜  
宇千林睠言祠屋密邇 喬寢行路咨嗟指彼綱  
常不沫英靈長近 耿光景練危節千古同芳  
列朝相承旌褒優恤名留竹簡享遍芬苾矧茲越  
廟豈任頽缺爰賚爰飭以葺以繕采楠重新籩豆  
有踐侔致泂酌文則親撰

忠壯公金德齡宣謚日致祭文

龍蛇之役義旅如堵雖則如堵莫武翼虎力能扛



鼎忠奮衛主南紀尺檄五千其募斥彼良疇剡厥  
強弩山陰夜鼓狡奴破膽威聞龍韜姿覲燕領七  
分摸來尚知難犯誰哉倡和戰壘中掩戎功未勒  
讒言已闖春山一曲淚沾英雄碧血未化白光流  
虹酌酒相賀藉冠則豐不待百年公議詢同 孝  
廟愍惻哀榮備隆拊髀之思每予及卿壹惠殊典  
千古令名酬報奚憾屈伸有常行將宣誥替致辦  
香庶歆寵光鎮我炎方

永陵忌辰攝行祭文

恭承丕緒每荷 靈隲隔日奉 諱有懷明發邈

矣 真遊六十一年斗迴涪灘痛切昊天庶諒替  
奠豈忽躬假大官駿奔小子齋沐

景慕宮冬至親祭文

亞歲維晨蠲服明裡洋洋孔邇孺慕采新

崇靈殿致祭文

天地之氣開有早晚羲畫軒裳在東混混午運所  
被神人首出古朝闢濛輝鮮初日左海蓊蓊是君  
是長史盖有云歷千厥享比小中華曰禮義邦匪  
直箕條檀化攸厖儲厥文明留與我家 列朝相  
承乃勛乃華如曦漸中君其羲軒跡或無徵德未



可謖翼翼西京東明是配奮威松壤建邦草昧佐  
以三俊異代同功徃歲維辛虔申徽衷心焉嚮慕  
理必有應辦香在心庶格神聽

崇仁殿致祭文

自師東來民免夫夷化在過存樹以倫彞淚比河  
清卽千一期世恨八條史多闕之諸家牽合強欲  
傳疑予惟至教匪待乎斯九疇丕叙百世是師建  
用五極化理攸推詩書禮樂特其俗宜簡厥教令  
以率蚩蚩皇王大猷豈專在茲欲質無憑悠哉我  
思溥彼平壤太師所治并甯靈泉畝畫遺規肅肅

古殿崇仁之楣髣髴如覲七分容儀寤寐聖謨齋  
誠致辭默誘予衷不迷大達

武烈祠致祭文

念昔小邦控難 帝庭始議出兵發言盈廷侯誰  
贊之兵部石公有來自北如羆如熊如貔如貅總  
于提督左楊右張共武有翼桓桓提督亦有難弟  
或以部分或以殿衛東人稽首涓上之祠邦之再  
造 皇所恩施微我石公粵諸大人疇承明旨疇  
蕩妖塵滄桑浩劫報祀無斃自我 列祖累致洞  
酌小子何述 先志是挖漢有宣武涓有武烈伐



鼓淵淵一體饗之何以饗之神皇之思

嶺穀北運時祭三道海神文

海運有役輒控于神匪敢勞神哀彼北民既理我  
楫既發我困願言利泊我心苦辛毋以否德神惟  
孔仁

右南海

往資嶺穀活我關東朝帆夕碇莫非神功今茲北  
運路過洋中冀推一視惠以順風嗟北之人望眼  
欲窮

右東海

一方之命寄在船粟自南自東倏焉以北功在一  
簣神任其責導夫前路不日斯泊俾慎終始普濟  
賑糴

右北海

忠定公趙墩致祭文

藥藥素冠斷斷赤血求之昔賢亦罕其匹荒郊几  
舄為誰棲遑楊山之足齋志斧堂精忠上薄帝閭  
莽蒼嗟予之忍屢送星霜歲周輟眷痛深亡鑑節  
壹旌楔婉行則歎瓊琚冰蘂乃卿之餘鼎茵奎班  
俾也忘諸特命薑桂曰篤恤孤相感者存毋吐我



酤

待教李崑秀致祭文

誰昔之夜予夢汝汝皂巾締袍拜且告訣予促汝  
膝控汝腕曰予扁汝居以壽齋祈汝壽也胡遽訣  
予言未訖咳噫欠伸起而聽漏夜將分顧語傍人  
記之詰朝走人訊汝病即去年九月二十二日也  
越數日計聞考日若時果驗烏虜異哉衆萬之生  
孰非夢也矧汝以夢托夢終歸於大夢而予則理  
夢中之夢悲汝之不能耐於夢場命乎命耶命也  
烏虜生而肝相照死而精不爽是日侑汝汝必飲



泣而歎汝其歎耶不歎耶已矣烏虜

文靖公徐命膺致祭文

蹟卿平生稽古之力矧有乃弟同我休戚寒花晚  
香夙予所詠有司考謚曰文曰靖詞垣寂寞耆英  
凋零何以酌之旨酒崇饒

列聖御製卷之四十九







